


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-26	As-Syu'ara'	227	11	Makkiyyah	Ke-47	10



Zaman Diturunkan

1. Surah as-Syu'ara' diturunkan pada peringkat ketiga kehidupan Rasulullah s.a.w. di Mekah antara tahun ke-6 hingga ke-10 Kenabian, ketika itu al-Qur'an berbahasa Arab dipertikaikan dengan begitu hebat dan Rasulullah s.a.w. dituduh gila. Pada ketika itu pemimpin-pemimpin kafir Quraisy dinasihatkan supaya mengambil i'tibar dan pengajaran daripada akibat buruk yang diterima oleh 6 kaum terdahulu iaitu kaum Nuh, kaum Tsamud, kaum Luth, kaum Syu'aib dan juga kaum Fir'aun yang menentang Musa.
2. Ayat ke-214 وَأَنْذِرْ عَشِيرَتَكَ الْأَقْرَبِينَ bagaimanapun diturunkan lebih awal ketika perintah Allah kepada RasulNya diberikan supaya mengisytiharkan secara terbuka ajaran Islam, ayat ini diturunkan pada tahun ke-4 Kenabian. Setelah diturunkan, Rasulullah s.a.w. terus naik ke atas bukit Shafa dan secara terbuka menyampaikan kepada penduduk Mekah seruan tauhid yang dibawa baginda. Shahih Bukhari, Kitab Tafsir, Bab Surah as-Syu'ara', hadits 4,492.

Kesinambungan Surah As-Syu'Ara' Dengan Surah Sebelum Dan Selepasnya

1. Di dalam Surah al-Furqaan telah pun diberikan jawapan yang membungkam kepada kritikan-kritikan orang-orang kafir berupa dalil-dalil عقلي, آفاقي dan انفسى tentang kebenaran seruan Rasulullah s.a.w. dan kebenaran al-Qur'an yang dibawa baginda.
2. Di dalam Surah as-Syu'ara' ini Allah mengemukakan dalil-dalil تاريخي tentang tauhid qudrat dan iradatNya dengan mengemukakan dua sifatNya, iaitu عزيز (Maha perkasa) dan رحيم (Maha penyanyang).
3. Dua perkara dikongsi bersama oleh surah-surah as-Syu'ara', an-Naml dan al-Qashash.
 - (a) Dengan mengemukakan kisah benar pertentangan di antara Nabi Musa dan Fir'aun, pemimpin-pemimpin Quraisy yang zalim diminta supaya tidak bersikap zalim seperti Fir'aun.
 - (b) Ketiga-tiga surah mengandungi nasihat kepada pemimpin-pemimpin Quraisy yang zalim supaya mengambil i'tibar dan pengajaran daripada kebinasaan kaum-kaum yang lalu.

Beberapa Kata Kunci, Tema Utama Surah Dan Ayat-Ayat Tarji` Yang Terdapat Di Dalamnya

1. Di dalam Surah as-Syu'ara' terdapat pertanyaan-pertanyaan seperti أَلَا يَتَّقُونَ (Apakah mereka tidak mahu menyelamatkan diri?), أَلَا تَتَّقُونَ (Adakah kamu tidak mahu menyelamatkan diri?) beberapa kali digunakan.

يَتَّقُونَ dan تَتَّقُونَ berpunca daripada perkataan taqwa, erti asas dan utamanya ialah menyelamatkan diri, menjaga diri. Maksudnya ialah seperti menyelamatkan diri daripada benda-benda haram, menyelamatkan diri daripada perkara-perkara mungkar, menyelamatkan diri daripada kemurkaan Allah dan menyelamatkan diri daripada akibat buruk yang akan menimpa di dunia dan di akhirat kerana

kejahatan-kejahatan yang dilakukan manusia.

(a) Seruan Nabi Nuh supaya bertaqwa أَلَا تَتَّقُونَ (Ayat: 106). Seruan Nuh supaya bertaqwa kepada pemimpin-pemimpin di zamannya bermaksud supaya mereka meninggalkan kesyirikan kerana menyembah lima jenis berhala, ia juga bererti menyeru mereka berhenti daripada memberi ancaman rejam kepada Nabi Nuh dan pengikut-pengikutnya, menganggap orang-orang biasa sebagai manusia-manusia yang hina, mengingkari kerasulan Nabi Nuh dan lain-lain, supaya dengan ketaqwaan itu mereka terselamat daripada ditimpa azab di dunia dan di akhirat.

(b) Seruan supaya bertaqwa oleh Nabi Hud أَلَا تَتَّقُونَ (Ayat: 124). Kaum 'Aad juga diseru oleh nabi mereka Nabi Hud supaya bertaqwa dengan meninggalkan kesyirikan, pemujaan terhadap nenek moyang, mengingkari adanya hari kiamat dan menganggap Nabi Hud sebagai pembohong dan bodoh. Mereka juga diminta supaya menghindarkan diri daripada bersikap sombong di dunia dan berhenti daripada menggunakan slogan مَنْ أَشَدُّ مِنَّا قُوَّةً (Tidak ada orang lebih kuat dari kita). Mereka juga diminta supaya berhenti bersikap zalim, kufur dan keras kepala, selain itu Nabi Hud juga menyeru kaumnya agar tidak menzalimi kaum-kaum lain dengan menyerang mereka secara sewenang-wenang, semua itu disampaikan Nabi Hud supaya umatnya terselamat daripada azab Allah di dunia dan di akhirat.

(c) Seruan bertaqwa oleh Nabi Shaleh أَلَا تَتَّقُونَ (Ayat: 142). Nabi Shaleh menyeru kaumnya, kaum Tsamud supaya tidak mengganggu unta betina yang dikeluarkan dari bukit batu sebagai mu'jizat beliau, mengingkari hari kiamat, melakukan kesyirikan dan memuja nenek moyang. Mereka juga diseru supaya mengelak diri daripada mengikut sembilan orang ketua perosak masyarakat yang sangat sombong, zalim dan kejam. Mereka juga diseru supaya tidak menuduh Shaleh sebagai orang yang kena sihir, menghentikan rancangan menyerang Shaleh dan keluarganya pada waktu malam dan tidak beriman kepadanya, semua itu disampaikan beliau supaya kaumnya terselamat daripada azab Allah di dunia dan di akhirat.

(d) Seruan bertaqwa oleh Nabi Luth أَلَا تَتَّقُونَ (Ayat: 161). Nabi Luth telah menyeru pemimpin-pemimpin kaumnya supaya tidak melakukan kerosakan, tidak melakukan perhubungan seks sejenis, berlaku zalim, merompak dan melakukan perbuatan-perbuatan keji yang lain. Mereka juga diminta supaya jangan mendustakan para rasul, seruan Nabi Luth kepada kaumnya hanyalah untuk menyelamatkan mereka daripada azab Allah di dunia dan di akhirat.

(e) Seruan taqwa oleh Nabi Syu'aib أَلَا تَتَّقُونَ (Ayat: 177). Nabi Syu'aib menyeru kaumnya khususnya pemimpin-pemimpin di kalangan mereka supaya tidak melakukan kesyirikan, tidak mengurangkan timbangan dan sukatan. Mereka juga dilarang daripada merompak, melakukan kerosakan di muka bumi

dan mencari rezeki melalui cara-cara yang haram. Seruan itu disampaikan oleh beliau supaya umatnya terselamat daripada azab Allah di dunia dan di akhirat.

(f) Seruan bertaqwa oleh Nabi Musa **أَلَا يَتَّقُونَ** (Ayat: 11). Nabi Musa telah berda'wah kepada Fir'aun dan kerajaan tenteranya supaya bertaqwa dengan meninggalkan perbuatan zalim dan kejam, berhenti daripada memuja dan melebihkan bangsanya, berhenti juga daripada membunuh Bani Israil, mereka diseru supaya tidak berlagak sombong di muka bumi dan tidak melakukan kerosakan padanya. Seruan itu disampaikan oleh Nabi Musa kepada mereka supaya mereka terselamat daripada azab Allah di dunia dan di akhirat.

2. Di dalam Surah as-Syu'ara' terdapat beberapa ayat tarji' iaitu ayat-ayat yang diulangi beberapa kali.

أَلَا تَتَّقُونَ ﴿٣١﴾ إِنِّي لَكُمْ رَسُولٌ أَمِينٌ ﴿٣٢﴾ فَاتَّقُوا اللَّهَ وَأَطِيعُوا ﴿٣٣﴾ وَمَا أَسْأَلُكُمْ عَلَيْهِ مِنْ أَجْرٍ إِنْ أَجْرِيَ إِلَّا عَلَىٰ رَبِّ الْعَالَمِينَ ﴿٣٤﴾

(Ayat: 109, 127, 145, 164 dan 180).

Daripada ayat tarji' itu dapat difahami beberapa perkara berikut:

- (a) 6 orang nabi di zaman masing-masing telah menyeru umat mereka supaya bertaqwa dengan erti mereka meninggalkan syirik, mengada-adakan perkara baharu dalam agama dan mengelak diri daripada melakukan pelbagai fitnah.
- (b) Kesemua 6 orang nabi itu mengisytiharkan bahawa mereka bukan sahaja utusan Allah, malah mereka juga orang yang amanah dan jujur.
- (c) Kesemua 6 orang nabi itu menyeru umatnya dengan berkata **فَاتَّقُوا اللَّهَ** yang bererti **أَعْبُدُ اللَّهَ** (Sembahlah kamu akan Allah), di samping itu mereka juga menyeru dengan berkata **وَأَطِيعُوا** (Taatlah kamu kepadaku).
- (d) Semua 6 orang nabi itu mengatakan kepada kaum masing-masing dengan jelas bahawa mereka tidak meminta duit daripada orang ramai, tidak juga meminta derma. Mereka datang untuk memberi, bukan menerima, para nabi itu bekerja untuk Allah dan mereka mengharapkan upah dari Allah, bukan dari manusia, mereka hanya menyeru dan berda'wah kepada agama dengan ikhlas.

3. **رَبُّ الْعَالَمِينَ**

رَبُّ الْعَالَمِينَ ﴿٣٤﴾

(Ayat: 16, 23, 47, 77, 98, 109, 127, 145, 164, 180 dan 192).

Perkataan **رَبُّ الْعَالَمِينَ** beberapa kali diulang sebut di dalam surah ini. Perkataan ini ada 5 ertinya: (a) Yang mendidik (b) Yang menjaga (c) Yang memiliki (d) Yang menguasai (e) Tuan yang berkuasa dan bebas menguruskan segala kehendaknya.

Beberapa perkara di bawah ini dapat difahami daripada pengulangan perkataan رَبُّ الْعَالَمِينَ itu:

(a) Sekalian nabi dan rasul mula-mula sekali akan menarik perhatian pengikut-pengikut mereka kepada tauhid rububiyyah, daripada tauhid rububiyyah itulah mereka akan menemui tauhid uluhiyyah.

(b) Orang-orang musyrikin Mekah menerima tauhid rububiyyah tetapi mereka selain melakukan syirik dalam ibadat, melakukan juga syirik dalam berhakimkan kepada selain Allah.

4. Di dalam Surah as-Syu'ara' juga setelah mengemukakan kisah-kisah benar 9 orang rasul, sebanyak 9 kali diulangi ayat tarji' ini, iaitu:

إِنَّ فِي ذَلِكَ لَآيَةً وَمَا كَانَ أَكْثَرُهُمْ مُؤْمِنِينَ ﴿٣٧﴾

(Ayat: 9, 68, 104, 122, 140, 159, 175, 191, 217).

Daripada ayat-ayat tarji' ini dapat difahami beberapa perkara berikut:

(a) Pada kisah benar 9 orang nabi itu terdapat آية, maksudnya ialah tanda kekuasaan Allah, tanda ada pembalasan baik dan buruk dan Allah membinasakan kaum yang derhaka kepada rasul-rasulNya, pengikut-pengikut dan pembela-pembela rasul-rasulNya pula diselamatkan.

(b) Daripada firman Allah وَمَا كَانَ أَكْثَرُهُمْ مُؤْمِنِينَ difahami bahawa manusia-manusia yang keras hatinya tidak akan mendapat pengajaran daripada kisah-kisah benar yang terdapat di dalam sejarah, kerana itu mereka tidak beriman.

5. Hikmat penggunaan dua sifat Allah الْعَزِيزُ dan الرَّحِيمُ di dalam Surah as-Syu'ara'.

Di dalam Surah as-Syu'ara' setelah mengemukakan kisah benar para rasul sebanyak 8 kali, dikemukakan ayat berikut sebagai ayat tarji':

وَأَنَّ رَبَّكَ لَهُوَ الْعَزِيزُ الرَّحِيمُ ﴿٤٠﴾

(Ayat: 9, 68, 104, 122, 140, 159, 175, 191). Sifat الْعَزِيزُ الرَّحِيمُ juga tersebut dalam ayat 217. Beberapa perkara berikut dapat disimpulkan daripada ayat tarji' ini.

(a) رَبُّ (tuhan) bersifat عَزِيزٌ terhadap orang-orang kafir, terhadap orang-orang mu'min pula Dia bersifat رَحِيمٌ.

(b) Setiap orang nabi memperkenalkan Allah melalui sifat-sifatNya.

(c) Daripada sejarah kebinasaan setiap bangsa, terdapat bukti bahawa رَبُّ (tuhan) sentiasa memerhati manusia, Dia sentiasa melihat siapakah manusia yang bersyukur dan siapakah pula manusia yang kufur (tidak bersyukur).

(d) Daripada sejarah kebinasaan setiap kaum, terbukti bahawa رَبُّ adalah عَزِيزٌ (Maha perkasa) terhadap orang-orang yang tidak bersyukur dan perosak-perosak masyarakat, Dia menghukum mereka di dunia

ini, itulah yang dikatakan pelajaran daripada sejarah, Dia juga akan menghukum mereka di akhirat nanti.

(e) Daripada sejarah kebinasaan setiap bangsa, terbukti bahawa رَبُّ جَبَّارٌ مُّهِمٌ, dengan sifat inilah Dia menyelamatkan hamba-hambaNya yang bersyukur daripada azab-azab di akhirat.

6. Di dalam Surah as-Syu'ara' ini tersebut bahawa tukang-tukang sihir yang hendak berlawan dengan Nabi Musa sebelum melemparkan tali-tali yang dipintal mereka dan tongkat-tongkat mereka, mengucapkan: بِعِزَّةِ فِرْعَوْنَ (Demi kebesaran dan kekuasaan Fir'aun) sebelum melemparkannya.

Itulah slogan mereka untuk menyatakan keperkasaan, kekuasaan, kemenangan dan kehebatan Fir'aun (Ayat: 44).

فَأَلْقُوا حِبَالَهُمْ وَعَصِيَّهُمْ وَقَالُوا بِعِزَّةِ فِرْعَوْنَ إِنَّا لَنَحْنُ الْغَالِبُونَ ﴿٤٤﴾

Tukang-tukang sihir itu kemudiannya menjadi penganut Islam yang kuat dan setia, mereka bahkan bersedia menghadapi segala macam ujian, mereka tidak lagi percaya kepada keperkasaan Fir'aun sebaliknya telah percaya kepada keperkasaan Allah sebagai tuhan yang غَزِيرٌ.

7. Di dalam Surah as-Syu'ara' juga terdapat ancaman kepada bangsa-bangsa yang mendustakan ajaran yang dibawa oleh para nabi dan rasul.

(a) Kaum Nuh telah mendustakan para rasul (Ayat: 105).

كَذَّبَتْ قَوْمُ نُوحٍ الْمُرْسَلِينَ ﴿١٠٥﴾

(b) Kaum 'Aad juga telah mendustakan para rasul (Ayat: 123).

كَذَّبَتْ عَادُ الْمُرْسَلِينَ ﴿١٢٣﴾

(c) Kaum Tsamud juga mendustakan para rasul (Ayat: 141).

كَذَّبَتْ ثَمُودُ الْمُرْسَلِينَ ﴿١٤١﴾

(d) Kaum Luth juga mendustakan para rasul (Ayat: 160).

كَذَّبَتْ قَوْمُ لُوطٍ الْمُرْسَلِينَ ﴿١٦٠﴾

(e) Ashaabul Aikah iaitu kaum Nabi Syu'aib juga mendustakan para rasul (Ayat: 176).

كَذَّبَ أَصْحَابُ آيَةَ الْمُرْسَلِينَ ﴿١٧٦﴾

(f) Kaum Quraisy juga telah mendustakan utusan Allah yang terakhir, Muhammad s.a.w., mereka bahkan memperolok-olokkannya. (Ayat: 6).

فَقَدْ كَذَّبُوا فَسَيَأْتِيهِمْ أَتْبَعُ مَا كَانُوا بِهٖ يَسْتَهْزِءُونَ ﴿٦﴾